



32,5 milliuns francs per la segirtad

HANS HUONDER/FMR

Quei che pareva illusoric avon 25 onns, cura che la Pro Lucmagn ha surpriu il survetsch d'unviern al Pass Lucmagn, ei daventau realitad ils davos onns: Cun plirs projects ei la via dil pass daventada ni daventa aunc pli segira pil traffic duront igl unviern. 32,5 milliuns francs ein vegni ni vegnan investai ils proxims onns. La mesjamna ha la Pro Lucmagn envidau ad in'uatga els dus territoris pertuccai dils projects.

«Igl emprem grond project che la cumissiun tecnica ha giu el decuors da quels 25 onns ei in'analisa dalla resca pil traffic silla via dil Pass Lucmagn staus», di *Nora Zürcher-Gasser*. Ensem cun *Fabrizio Conceprio* – omisdu comembers dalla cumissiun tecnica – eis ella vegnida alla conclusiun che dus territoris ensiarrien in prighel pil traffic. «Dalla vart grischuna ei quei stau il tschancun directamein dalla vart dil nord dalla gallaria existent a S. Maria. Dalla vart dil sid havein nus constatau beinspert ch'il territori sur Acquacalda/Pian Segno hagi il potenzial per lavinas regularas entochen en via», di *Nora Zürcher-Gasser*.

«Avon 25 onns ein mesiras per migliurar la situaziun dalla vart tessinesa stadas negin tema, era pervia dil status cun zonas da protecziun. Avon rodund 15 onns ei lu denton vegniu instradau in process che ha menau a ponderaziuns concretas co segir il territori pil traffic igl unviern», di *Fabrizio Conceprio*. Ils projects realisai ni sin rucca ein vegni presentai la mesjamna ad autoritads cantunalas e communalas sco era a hosps. La sera ha la radunonza generala dall'Uniun Pro Lucmagn lu giu liug el restaurant a S. Maria (mira box).

Pliras mesiras a Pian Segno

Il tschancun dalla via cantunala tessinesa naven dall'ustria ad Acquacalda engiuviars en direcziun Pian Segno ei periclitau da lavinas schigleiti ch'ei ha denter 40 e 50 cm neiv ellas plauncas. Leu ei vegniu instradau in project cun differentas mesiras per migliurar la situaziun dil traffic. In'emprema – duas petgas da sigliantar automaticamein lavinas sco era lavineras sur quellas – ei realisada. «Sin fundament d'ina staziun da mesiraziun dalla neiv savein nus decider da di e da notg cu sigliantar lavinas. La finamira ei da far quei cun in quantum neiv ch'arriva lu buc entochen en via e caschu-

na leu cuosts da rumir», di *Fabrizio Conceprio*.

Ils proxims 15 onns vegn erigiu sin ina surfatscha da rodund 70 hectaras el territori nov kilometers lavineras e travs, 4000 bucs e plantau 20'000 plantinas da pégn, schiember ni larisch. Sco il menader digl Uffeci per prighels dalla natira e projects dil cantun Grischun, *Stefano Baggi* di, succedan quellavurs en pliras etappas. Ils elements da lavineras e bucs vegnan construi spirontamein cun lenn. Tenor igl in-schignier forestal circuitual dalla Val Blenio, *Daniele Barra*, sorprendan Cantun e Confederaziun 80 % dils cuosts dil project, 15 % igl Uffeci da construcziun bassa dil cantun Tessin ed il rest la vischnaunca da Blenio.

Prolunghiu la Gallaria Scopi

17,5 milliuns francs ha il cantun Grischun investau totalmein ella sanaziun e la prolunga-ziun dalla Gallaria Scopi sil hospezi dil Pass Lucmagn. «La prolunga-ziun dalla gallaria per 320 meters enviers nord eliminescha in tschancun da via periclitau savens da lavinas. Gia igl unviern 2023/24 cun dabia neiv ha mussau che quella part nova dalla gallaria fa in bien survetsch e spargna a nus cuosts da rumir neiv ord via», di *Nora Zürcher-Gasser*.

Tenor *Jochen Eckert* digl Uffeci da construcziun bassa dil cantun Grischun ein las lavurs vid quei project terminadas: «Quei vul denton buca dir ch'ei detti da far nuot pli vid la via dil Pass Lucmagn. Ils proxims onns vegnan plirs tschancuns sanai, sco quei ch'igl ei il mument il cass.» L'entira Gallaria Scopi che mesira 2,5 km ei vegnida cumpletada cun pusseivladads da fugir per persunas en cass d'incaps ella gallaria. Pigl unviern ein otg locals da protecziun vegni construi. En in seracass ella gallaria anfla la glied leu protecziun cumpleina entochen ch'il survetsch d'agid arriva. Pil traffic plaun – vul dir

La Quotidiana
7007 Chur
081/ 255 52 52
<https://www.suedostschweiz.ch/laquotidiana>

Medienart: Print
Medientyp: Tages- und Wochenmedien
Auflage: 3'244
Erscheinungsweise: täglich



Seite: 5
Fläche: 81'900 mm²

Auftrag: 3007101
Themen-Nr.: 320023
Referenz:
3704ff88-4dad-4fed-b243-079c51ca1cf9
Ausschnitt Seite: 2/2

viandonts e mountainbikers – exista ussa la pus-
seivladad da viandar ni carrar silla gallaria sezza.



La Gallaria Scopi sil Pass Lucmagn ei vegnida prolunghida per 320 meters. Quei tschancun da via ei protegius ussa da lavinas.

FOTOS HANS HUONDER



Survesta dil territori sur Pian Segno. Leu dat ei plirs loghens cun potenzial per lavinas.

Il Pass Lucmagn ei staus serraus tschun dis igl unviern 2024/25

La Pro Lucmagn ha salvau sia radunonza generala la mesjamna sera el restaurant da S. Maria sil Pass Lucmagn. El center da quella ein stadas las tractandas statutarias. «Cul menaschi digl unviern vargau essan nus fetg cuntents, era grazia alla pauca neiv e cheutras in'activitad da lavinas relativamein pintga», scriva il president dall'Uniu Pro Lucmagn, *Martin Candinas*, el rapport annual. Digl emprem da november entochen la fin d'avrel ha il pass stuiu vegnir serraus sulettamein tschun dis. «Empau fastedis ha il glatsch cuschunau als collaboraturs e las fatschentas che rumieschan la via. Quei ei stau il cass surtut el contuorn dallas gallarias», constatescha

Martin Candinas. Il menaschi ha custau 636 000 francs, quei ch'ei levamein sut la media da rodund 649 000 francs dils davos 25 onns. «La reduzziun da cuosts ei segiramein era d'attribuir allas mesiras pridas ils davos onns», scriva Martin Candinas.

In'emprema bilanza positiva sa el trer dallas novas colligaziuns da bus la stad da Biasca a Mustér ed il cuntrari. Las circumstanzi per patertgar vid colligaziuns dil taffic public era igl unviern seigien bunas. Sin damonda dalla FMR ha Martin Candinas tratg in'emprema bilanza dallas frequenzas da questa emprema stad: «Ils resuns che nus havein dils menaschis dils bus ein positivs. Las colligaziuns senza midada sil pass paran d'esser in basegns.»

(fmr/hh)